

## **Tshenyo ya disakarete tse mokotsweng le tse seng molaong tsa boleng ba R43-million**

12 Phuptjane 2023 – Karolo ya Bolaodi ba Meedi ya Ditshebeletso tsa Lekgetho tsa Afrika Borwa (SARS) kajeno e qadile ka tshenyo ya disakarete tse seng molaong le tse mokotsweng tsa boleng ba R43 million, mane ledibohong la Beitbridge.

Motlatsa Khomishenara, Mong Johnstone Makhubu, o boletse hore ke moqeqeko o moholo wa disakarete o tlang ho senngwa, ke paloyohle ya makase a sehlooho a 2000, kapa disakarete tse 20 million, mme sena se bolela hore tshenyo ena ya disakarete tse seng molaong le tse mokotsweng ho ka nna ha nka matsatsi a mmalwa.

Disakarete tsena tse seng molaong le tse mokotsweng di ile tsa hapuwa matsholong a dihlopha tse ngata mmoho le matsholong a mautlwela jwalo ka karolo ya mawala a karolo ena ya Bolaodi ba Meedi, a etelletswe pele ke sehlopha se bitswang *National Rapid Response Team*, seo kamehla se tsheheditsweng ke Sesole sa Naha sa Afrika Borwa (SANDF), Ditshebeletso tsa Sepolesa sa Afrika Borwa (SAPS) le yuniti ya sona e bitswang *Hawks*, mmoho le karolo ya bofalli ya Lefapha la Merero ya Selehae.

Motlatsa Khomishenara o tlatsitse ka hore ho le leng la matsholo a jwalo ka Hlakola monongwaha hona ledibohong lena la Beitbridge:

- Ke paloyohle ya makase a sehlooho a 1211 a disakarete tse seng molaong tsa mefuta ya Remington Gold, Chelsea le Royal Express, a boleng bo lekanyetswang ho R26 million a ileng a hapuwa.
- Ho tshwerwe batho ba bane mme ho butswe dinyewe tsa bonokwane mabapi le ho rekisa le ho mokola disakarete tse seng molaong.
- Ke diteraka tse 4, vene e le nngwe le terekere e hulang treilara, tse neng di sebediswa ho jara disakarete tsena tse seng molaong, tseo boleng ba tsona bo lekanyetswang ho ba tjhelete e fetang R3 million.

SARS, mmoho le Karolo ya Bolaodi ba Meedi, ba ntse ba lomahantse meno maikemisetso a bona a mawala a ho kgothaletsa boikobelo ba tefo ya lekgetho ka boithaopo hara balefalekgetho le bahwebi. Sena se bolela hore SARS e na le maikemisetso a mawala ho etsa hore boikobelo bo be bonolo, ho fana ka lesedi le thuto bakeng sa tlhakisetsa le nnetefaletsa, le ho etsa hore dintho di be thata le ho ba le ditjeo tse hodimo ho bao ba hanang ho ikobela molao ka boomo.

“Sena se bolela hore SARS ha e na mamello hohang bakeng sa batho kapa mekgatlo e kgathang tema botlokotsebeng ba lekgetho kapa kgwebisanong e seng molaong le hore SARS e tla dula e le diretheng tsa bona ntle le ho fela matla.”

Kgwebisano e seng molaong e utswetsa mmuso lekgetho le hlokehang haholo mme e senya diindasteri, e mpefatse tlhokeho ya mesebetsi, bofuma le ho se lekane. Dihlahiswa tse seng molaong tse tliwang le ho romellwa ka ntle ho naha, di akga ka hare makoloi a seng a sebedisitswe, bommaditshibana, diaparo, matlalo le masela, moralo wa motheo wa bohlokwa (koporo le tshepe) le kgauta hara tse ding. Sehlopha

sa tshebetso sa ditheo tse ngata (IAWG) se thehilwe ho tobana le mefuta yohle ya kgwebisano e seng molaong.

Molaodi wa Bolaodi ba Meedi le Dihlahiswa tsa Naha, Mong. Beyers Theron, o boletse hore jwalo ka karolo ya leano la nako e telele, Bolaodi ba Meedi bo tlile ka ditsela tsa ho neha bahwebi ba ikobelang melemo e itseng ka tshebediso ya mmotlolo o bitswang *Accredited Economic Operator*. Melemo ena e akaretsa poloko ho tse mabapi le ditjeo le dinako tse potlakileng, hara tse ding. Ka tsela e tshwanang, SARS e maphathaphathe ho phethahatsa theknoloji e bohlale ya madibohong e bitswang SMART ho tjhorisa bokgoni ba yona ba ho fokisa le ho arabela ho se ikobele tefo ya lekgetho.

"Haesale hoba ho be le diphuphutso tse hlophisitsweng le tse tsepameng tse ntseng di etswa ke Bolaodi ba Meedi dilemong tse tharo tse fetileng indastering ena ya kwae le disakarete, ho se ho na le keketseho e bonahalang ya ho mokola madibohong ka tshebediso ya se bitswang hore ke "runners". Bana ha se batho ka bomong ba bona ba mokolang disakarate tsena jwalo ka tsela ya ho iketsetsa kgwebo empa ke maqulwana a hlophisitsweng a dinokwane a sebedisang hampe ba hlokang mesebetsi le ba fumanehileng ho ba hira ho ba bajari ba dithoto tsena, mme hangata ba tsamaya maeto a malelele ho phatlalla le meedi.

"Bajari bana ba jara bonnyane makase a sehlooho a mabedi a disakarate tse seng molaong mekokotlong ya bona leeto ka leng, mme hangata ba nka maeto a mangatangata. Disakarate tsena di ye di laelwe ka hara diteraka, dipalangweng tsa dithoto tse nnyane, makoloing le ditekesing tse emelang tsena ho bapa le madiboho hore jwale di tle di tsebe ho abelwa dibaka tse fapaneng tsa mmaraka wa lehae, ho rialo Mong. Theron.

Ho fumana lesedi le fetang lena, ikopanye le [SarsMedia@sars.gov.za](mailto:SarsMedia@sars.gov.za)